

續安陽縣志

卷十六至卷末

續安陽縣志篇目

卷一

大事記

自商王河亶甲起

卷二

職官表

清知縣 民國知事 縣長 縣丞 教諭 訓導 典史 知府附

選舉表

進士舉貢大學專門國會議員省議員縣議員考取職官區長會長皆附焉

卷三

地理志

沿革 疆域 山川 水利 土壤(附土宜) 物產 氣候

卷四

民政志

土地(附統計表) 戶口 行政區域 自治(附保甲) 警務 衛生 倉儲 救卹

卷五

財政志

田賦(附等數表) 漕糧 賦稅 雜稅 鹽課 歲計(附改良田賦徵收法原委及管理財政各機關沿革)

卷六

交通志 陸路 航運 鐵路 汽車路 橋梁 郵遞 電報 電話

卷七

實業志 農 工 商 礦

卷八

教育志 編學 書院 義學 學校 社會教育 典祀

卷九

兵防志 城防 鄉團

卷十

社會志 民生 禮俗 聲樂 歌謠 方言(附俗語格言) 報館

卷十一

宗教志 佛教 道教 回教 基督教 天主教

卷十二

建置志 城池 官廨 監獄 機關 倉庫 教室 公園 會場 祠廟

卷十三

古蹟志

地理 宮室 陵墓

卷十四

藝文志

卷十五

循政志

卷十六

人物志

鄉宦 耆舊 孝友 忠義 任卹 文學 方術 列女 流寓

卷末

雜記

附刊

續金石錄

甲骨文

任卹

湯丙

湯丙，縣南三十里美河鋪人。清乾隆某年歲大饑，丙施粥救人，所活甚多。乾隆五年七月，河南巡撫雅爾圖以好善樂施表其門。

阮希賢

阮希賢，縣西邵村人。家小康，性慈厚，常年備粥食餓者，舍茶水及單棉衣服，窮嫠多受其賜。自清嘉慶時至今，閱四世，遵行弗怠。光緒丁丑大祲，希賢孫維垣日施粥兩次，救濟尤夥。四年春，癘疫盛行，尸骸相望，維垣施棺捨席，雇工掩葬，日必數起，鄉民稱服。

張廷獻

張廷獻，字家修，縣東崇義村人。清歲貢，積學敦品，以忠孝廉節實行踐履自期。設帳授徒，一時知名士，半出其門。清之末葉，安陽徵收黑暗，每完正銀一兩，勒索車馬等費，多至四五千文。邑人苦之，廷獻與邑紳王大令有容、鄭廣文、鼎銘、馬觀察吉森呈明上憲，清積弊，訂新章，立車馬局，歸紳承辦，正銀一兩，但納使換錢四百八十文，殘破里分遞減，民困以舒。未久，又有單釐不鉤情弊，戶書上下其手，廷獻復邀邑紳許明經、樹棠、魯

茂才鎮藩等稟請改正戶民稱便。洹水至崇義村附近于曹逍遙兩渡口。春夏撐船。秋冬築橋。以利行人。惟款項無着。時形拮据。廷獻先事綢繆。仿照下游曹馬村辦法。募捐生息。儲爲的款。使一勞永逸。至彌留時。猶喃喃囑語。勉最後人。勿忘所囑。子蘭臺。庠生。鳳臺。自有傳。

吳山

吳山字達君。水冶人。道光丁酉拔貢。性嗜讀。好爲經世之學。旁及醫卜勘輿。均能達其深奧。咸豐時。盜匪猖獗。人民震懼。水冶舊有土寨。歲久傾廢。紳商稟官修築。邑令委山督工。畀以寨首名義。藉資倡率。自咸豐辛酉。至同治甲子。越四載。工竣。山猶以低促爲患。丁卯冬。流寇復竄彰。游騎距水冶僅十數里。人益恟懼。山率眾據守。晝夜督察。得免於危。戊辰。又募款萬緡。寨垣增高三尺。雉堞易土以甌。逾兩年。工復竣。所餘貲款。置龍台陽台兩水磴。今逾六十餘年。凡寨垣有補修之役。仍以磴租存款相挹注。其寨工局之組織。純係義務。無半文浮費。今父老龐碩。猶稱其清高廉潔。譽爲辦公者之楷模焉。嘗匪氛猖獗。法紀蕩然。凡他鄉良民。被俘潛逃者。率以奸細疑之。有所捉獲。輒欲梟首。一日有三四人竄冶。眾疑爲間諜。擬殲之以遏亂。山登寨呼曰。殺人償命。幸勿輕忽。旋

加盤詰，均他省被匪虜掠者，乃送縣遣歸。子瑞陽、瑞芬，均庠生。

孫如環

孫如環，字象五，本城人。道光二十九年選拔，朝考二等，就教諭。咸豐八年，城內土工及地痞，恣睢結黨，遇戶民喪葬，率把持勒訛，不得遽安窆。如環邀紳董劉錫恆等，購葬具多數，供商民需用，數旬，靈輜安窆者數百家。張總愚部攻彰德，勢危甚，如環偕官紳晝夜巡城，俾不得逞。事定，奏加內閣中書銜，賞戴藍翎，壽七十四卒。

張百朋

張百朋，字錫我，縣東王貴莊人。清嘉慶丁卯，以武科舉於鄉。性伉爽，見義勇爲。廣潤陂肇始於隋開皇時，歷唐宋元明清千餘載，利害互見。乾隆五十九年，漳河汎濫南徙，下游淤障，是陂遂成澤國。洪水積聚，延十二載，浸沒民田，至千餘頃。水災浩大，縣署匿不報聞，催迫田賦至急。百朋呼籲喊控，奔走數載，後河南巡撫姚祖同親臨勘測，據實陳奏，賦稅始獲蠲免。廣潤陂置有碑碣，紀此事頗詳。

衛苞

衛苞，字茂林，縣東瓦店人。有至性，幼失怙恃，哀毀如成人。事兩兄恭謹，雖呵斥，恆笑受。

之視子姪如一。調恤親黨不少吝。或迎養於家。或分給廬舍。有竊其禾者。笑而遣之。且益之以禾。子弟被人欺侮。苞不與校。且以好言慰藉之。人多慚服。生平精醫學。祖傳外科。尤善治痔漏。凡抱病遠來。或窮於衣食。苞皆酌加贈助。瀕行。復給資斧。醫人數十年。不責酬金。士之無志氣而爲人所輕鄙者。每嗤曰。汝從瓦店來乎。聞此諺語。可知苞精於醫痔矣。山西高平縣鹿大令額其門曰。今生和緩。年七十卒。子四。季萬庭。治廣潤陂。祛水患。尤著稱。

許蘭臺

許蘭臺。字蕙亭。縣北蘇度村人。清庠生。有至性。以孝友稱。父世俊。亦庠生。蘭臺承家學。以躬行實踐爲主。先世家本富有。及身中落。所遺外欠簿盈箱累篋。蘭臺慮子孫困約。時或按簿索討。遂焚之。時欠戶不皆貧困。聞耗多登門叩謝。餽送儀品。以申感激者。同治五年。東匪犯臨邑杜村。勢甚急。與安境僅一水之隔。縣北一帶震恐。邑令金寶符。飭辦團練聯防漳河。委蘭臺與武舉李醇董其事。備禦周密。寇不得逞。邑令上其績。賞五品軍功銜。六年十二月二十九日。大股匪越縣境北竄。鄉村義勇多結團抵抗。以眾寡懸殊。力竭身殉者甚夥。蘭臺偕劉梓齡孝廉。鄭文謨茂才。將男女姓名住址。及死事狀。

况逐細調查，呈報縣署，請卹。今按名登列忠義節烈志者，皆本之當日存冊也。當張總愚部捲土北上，傳係懷慶人，慫恿之亂定後，凡自北南旋，道經安陽者，聞係懷慶人，率多留難。一日，村眾獲四人，皆懷籍，將殺之。蘭臺曰：「道路傳聞，未可輕信，且斷無懷慶人一一仇視彰人理，四人皆良民，宜釋之。」四人拜泣曰：「某等南歸，道經村落甚多，安得人人如先生者，哀而生之耶？」同一死也。死先生前，不猶愈他所乎？蘭亭給函遣之。晚年邃醫術，治胎產痘疹尤效，求者踵接，向不責謝。子蔭棠，庠生，樹棠，恩貢，另有傳。

李文瀾

李文瀾，字普安，縣西四十里阜城村人。父廷校，以農商致富，厚歿時，遺有煙坊一所，屬近族公有。歲獲頗鉅，文瀾慨邀中證，焚己所持之券，復出錢萬貫，昇宗人，俾謀久遠。地方偶有水旱，卽遠在鄰封，必輸金周濟。光緒丁丑歲大祲，人相食，文瀾出私粟，平市價，復蠲租數千貫，拯卹困悴，歷任邑宰，皆雅重之。縣令鄭雲官嘗曰：「有財不恃財，且善用以保其財，安邑惟一李某耳。」咸豐同治間，張總愚部屢北犯，鄉人恟怖，流離失所。村西南水冶鎮，舊築土寨，歲久傾圯。紳耆吳山承縣委，改築石城。文瀾出鉅貲助其成，又水冶鎮西二里許，有珠泉，東流爲廣遂渠，泉之四圍，向皆土岸，易壅塞。文瀾請於官，獨力

營治、登以石圩、源開流暢、民尤利賴、生平事母孝、嫂氏劉、孀居無出、待之尤謹篤、幼從趙孝廉惠堂讀、及主家務、仍留趙主講、擇戚族子弟多人、咸令就學、修脯則自任、暇則入塾、躬聆講演、丁丑、自山右購侍婢、擬充簪室、詢知爲有夫之妻、給貲歸之、迄於今日、猶有李善人之稱、子三次、學釗、清文生、公舉孝廉方正、歷充本邑第六區區長、安陽公款局局長、恭勤清儉、里黨賢之、

李宗模

李宗模、字範山、縣東北王彥村人、清監生、性倜爽、遇戚黨有急難、飲助無吝色、姊適臨漳倪姓、望族也、有子六、次與三俱茂才、尙義任俠、仇視者以莫須有事、陷之犴狴、宗模廉其冤、出資命其家人叩關、時大司寇爲武陟毛公昶熙、覽狀剖雪、里人爲之語曰、老監生、魯仲連、祇重親戚不重錢、倪門今日見青天、同治六年、張總愚部竄彰、經王彥宗模子被擄、拊膺泣曰、自問無負心事、何遽遭此慘變耶、越兩月、子逃歸、益從事施捨、凡所稱貸、概不責償、晚年邃易學、能決休咎、兼擅青烏術、顧不以此炫人、著有讀易鑰、圖象淺說等書、

鄭鼎銘

鄭鼎銘，字美卿，縣北辛店人，家素封，能力學。年二十四，入邑庠，納粟選武陟教諭，旋調尉氏。光緒十年，乞假歸。邑人以里差舞弊，正糧外每銀一兩，勒索浮費甚鉅，羣苦之。疊經訟爭，縣令李某袒差胥，竟不得直。士氣激昂，釀成罷考風潮。公推鼎銘與邑紳王大令有容、馬觀察吉森聯名上控。河南巡撫邊，轉飭河北道許振禕查辦。令安陽創立車馬局，釐定章程，改歸紳辦。每銀一兩，正里出車馬費大錢四百八十文，殘破里出大錢二百三十文，不得外增分毫。糧民稱便。子蔭南，庠生。

胡士信

胡士信，字誠齋，縣北安陽橋人，清貢生，家小康。任北區區長，數載，遇地方公要，招集分區長及村正副，開會研商，歲十餘次。飲食雜費，悉由一己負擔，不另派款於民。村民間有爭執，一以和平開導，俾使悔悟。其時區息訟會，尙未萌芽，而士信已先行之。清末，省諮議局成立，邑人公舉士信爲議員，清慎自持，爲時所稱。

李掄元

李掄元，字華榜，縣西南元二莊人，崇儒術，好施舍。光緒丁丑，歲大侵，人多餓斃。掄元施粥救濟，自三年冬迄四年秋，每飯必親嘗生熟，放飯時，秩序井然，有賣食小販某，在村

外被餓民劫奪，曰：食盡不惜，惜基金盡失，無以求微利，養老母耳。余死，母亦難存，嗚咽不止，掄元聞之，計本利若干，照數付給。迄今父老猶稱道軼事不置云。

裴永泉

裴永泉，字有本，水冶人，性仁慈，憐貧卹孤，每有所施，略不計生產。鄉里號爲善人。比鄰宇文元，幼孤，母他適，依諸父某丐生活。某虐遇之，一日，以細故暴撻幾斃，且迸門外，嚴寒雪夜，幾無生理。永泉聞哭聲，悽慘，啟門審視，憫之，掖入室，推食解衣，元得不死。自是元居裴家，永泉飲食教誨無異子姪。元既長，命習商黽口，又時以父慈子孝之說爲元及其諸父某循循勸導，某頗愧悔。元亦服從訓諭，歸家婚娶，其婦永泉爲所擇配也。年七十一卒，子五，三吉仁，早逝，妻吳，子婦張，均以節烈載列女志。長吉福，以吉仁早逝，憐其二子，教養成立，鄉里稱之。

呂遇唐

呂遇唐，字金亭，縣東豆官營人，武生，輕財好義，歲饑，出金粟，周給鄉鄰，紳民立碑頌德。

楊連三

楊連三，馮宿邨人，少聰穎，事母孝，淬志讀書，弱冠，補博士弟子員，創辦本村小學校，民

國元年充縣議會議員。

楊士謙

楊士謙，縣東馮宿村人。清武生，天性孝友。同治甲子舉鄉試，充兵部差官。第士廉，亦武魁。以親老奉侍左右，恬於進取。楊氏世以積粟濟貧著，遇親屬有急難，尤必解囊贈助。士謙子金山，能世其德。光緒二十六年，荒旱成災，金山以所積穀麥五百餘石，散給鄉里，時論韙之。

郭統先

郭統先，字緒之，縣西北七十里積善村人。清庠生，性忠厚，親鄰無力婚葬，咸加周卹。附近村民忿爭，率赴統先伸說，取其一言以爲決。年六十三卒。子三：長奇峰，武生；次景熙，同治庚午舉人；陳留縣教諭；三景明，文生。

王敬修

王敬修，字功懋，縣西南四十里老河溝人。性任俠，喜讀書，抑強扶弱，周急濟貧。同治七年，張總愚部北擾，鄉民合組連莊會於上古寺，從事防禦，以勢殊，死亡枕藉。十月，有被擄者二人，自北逃歸，爲會捉獲，已殺其一，餘一人，刀逼其頸，適敬修至，驚呼勸止，詳加

盤詰，係鄭姓，年十七，懷慶修武縣恩村農家子也。遂力保，全其生命，掖至家。突有百餘人，持械蠶擁，麇集，勢洶洶，必欲索鄭姓子而殲之。敬修挺身前曰：「頭可斷，此子不能殺也。」雙方相持，幾釀巨禍。幸親屬張和杜恒昌等，多方解脫，眾始退。次年三月亂定，飭人往尋鄭兄，俾與同歸。生平敬愛字紙，雖糞穢，必撥取湔曝，移時焚化。子四，銘心、銘盤，皆文生。

王玉華

王玉華，字崑山，東大佛村人。九世同居，人無閒言。玉華素行淳良，輕財好義，鄰里有以婚喪不給告者，卽如所求應之。遇歲歉，必輸粟煮粥，賑救饑餓。近數十年，善行尤篤。每屆冬三月，必設粥廠，早晚兩餐，日食貧民百餘口，需費不貲，無吝色。前華北救災會岳某，曾將所食餓民全體攝影，以誌紀念。子孝德，至今猶遵遺志，施粥不廢。

趙大才

趙大才，字聚奎，曹馬村人。持躬謹飭，勇於義舉。村前洹水逕流，舊由辛姓倡修義船草橋，以濟行旅。並公推管事若干人襄理。六年一易，惟大才終身担任，未嘗一息仔肩。眷屬三十餘人，五世同堂，無一言相忤。年九十七，從容坐逝。

李占鰲

李占鰲，縣北淨渠村人。生平以挖北天平渠爲己任，經營數十載，屢遭挫折，志不少屈。貲產蕩然，雖未竣事，後人溯其規畫，依次興辦，得以觀成，鄉民均利賴之。

呂繼先

呂繼先，字紹宗，縣東豆官營人。孝友勤儉，樂善好施。中年失恃，事父彌謹。雖家奴甚夥，而於父之起居，服食鹽櫛，無不躬親。以母逝，待姊愈厚。姊適苗姓，有二甥，爲延師教讀，繼習弓矢數年，一中武魁。一入武庠。鄉里榮之。道光二十七年，歲荒旱，餓殍相望。繼先竭力賑濟，全活甚眾。咸豐七年，東匪猖獗，繼先倡議修寨。其時民窮財匱，議定畝捐之外，獨輸款五百餘竿。寨功告成，四方得免蹂躪。其餘濟貧周急，排難息訟等事，不可枚舉。壽八十，子遇文、遇唐，皆武生。

吳日章

吳日章，縣西北六十里觀台人。清文生。咸豐七年，創修渠堰，引漳水灌田，四十餘頃。後稱金公渠。

吳萬興

吳萬興，縣西北八十里鑛窟村人。天性仁讓，家道雍睦，八世同居，人無閒言。有故舊李兆陽病貧，萬興助五十金，俾資經營。其人以商業躋小康，族人吳萬章衰老無歸，萬興養之。及卒，具衣衾殮葬，所留葬銀至今代爲完納。戚屬陳占魁幼失怙恃，貧困無依，撫之成立，並爲婚娶。

武治忠

武治忠，縣西北七十五里石堂村人。業農，輕財好義。村外有山路，名曰馬坂，險惡難行，治忠獨捐巨貲修之，數里竟成康衢。工竣，有以泐石請者，治忠曰：「平治道路，民衆應盡責也，可炫美以沽譽耶？」其悃愾如此。

李時昌

李時昌，字壽山，縣西水冶人。事母以孝聞，族中舊有祭祖田，經近支變價，出資贖之。業師苗中選家窘，助給水田數畝。邑紳李孝廉健仁病故，卹其孤，有親黨楊某蒙冤陷大獄，盡力營救，俾免阨。凡告貸至，必酌量攸助。尹某婚弗能娶，張姓子弗能婚，給貲使成禮。龍山傭工某赴冶貿易，忽失携紙幣，泣於路隅，時昌聞之，助款如其所失數。清光緒辛丑，兩宮回鑾，丙午彰德大操，差務繁重，時昌均任勦辦，上憲獎以急公好義匾額，旋

原书缺页